



El tenpo: córare o ralentare?

Semo da poco vegnù fora da la pausa estiva e semo tornà a fare quello che se faseva prima. Come xe mèjo afrontare la nova stajon lavorativa? Xe ben métarse a córare par recuperare el tenpo de le ciàcole estive, o xe mèjo ridure... la corsa contro el tenpo?

Anca senza rèndar-sene conto, scometo che sta domanda a se la ghemo fata tuti, na volta che semo rientrà da la vacanza al mare, al lago, a la montagna o a ramocia, sarà sù in casa, parché i vizini no i diga che ne xe mancà le petenele da permètare na vacanza no sò dove.

Forse se ghemo anca dito: *"Come passa el tenpo! No te fè mia ora a métare el piè so 'l paradiso terestre de le ferie, che za te toca voltarte indrio e métarte a fare quello ca te fasevi prima! El sarà anca on gran maestro, el tenpo, ma el fa morire tuti i so scolari!"*

Son convinto che, senza cativeria, a semo on poco tuti rabià col tenpo; verso de lu no ghemo par gnente na gran sinpatia; lo vedemo come on ladro, on nemico, on male, na bruta bestia che ne speta al varco par tuta la vita. Invesse, al contrario, el xe on amico onesto, che ne compagna e ne ricorda che no bisogna butàrghe via gnanca na frégola, parché no 'l torna pi. Bisogna tegnèrselo in bona, parché no ghe xe gnente al mondo che ne se rivolta contro pi del tenpo.

Ma la domanda de base xe: *"Come ghemo da comportarse de fronte al tenpo?"* Na risposta ùnica no la esiste: xe dimostrà che par i veci el tenpo el passa piassè in pressia che non par i zóvani che ghe pare de poder senpre riciapar-



Ma che fadiga portare el "peso" del tempo!
(Il Tempo, statua del Giardino di Villa Barbarigo - Valsanzibio-PD)

lo in man. Eppure lu el xe preciso par tuti. Tuti, có se se sveja a la matina, se ga a disposizion on borson pien de ore: esatamente vintiquattro, né una de pi né una de manco: vintiquattro ore par tuti, vintiquattro ore a nostra disposizion, da far frutare al mèjo, da no sprecare e da spèndare secondo le proprie regole de vita.

Eco 'lora che no xe né da córare, né da ralentare: bisogna seguire le proprie esigenze, tegnendo senpre presente che, par fare contento el

prossimo, xe ben che sia contento mi, parché se son contento mi, riesso a far contenti anca i altri; se son felice mi, riesso a far felici i altri, no desmentegando mai che el tenpo speso par i altri, in definitiva, el xe speso ben anca par noantri. Par questo xe inportante assè abituarse a spèndare el nostro tenpo a favore de la giustizia, de la libertà, de la solidarietà nel mondo.

Tante volte se sente dire che *"il tempo è denaro"*. Sì, parché xe come se ogni giorno te vegnesse messo a disposizion na cifra fissa de schei: se te li spendi, bene, se no te li spendi, pezo par ti: *"ogni lasciato è perso"*: có xe sera, el tacuìn torna vodo. La stessa roba el giorno dopo, e quello dopo oncora. Dunque bisogna vivere el presente, fasendo ogni giorno el mèjo investimento, dàndoghe el giusto valore a ogni àtimo a disposizion, parché chel'àtimo xe na pìcola parte de la nostra vita che se consuma.

Se gavì osservà, l'omo moderno el fa tute le robe pi in pressia possibile par no pèrdare tenpo, ma dopo no 'l sa cossa fare del tenpo guadagnà e spesso el lo spreca, parché saver usare ben el tenpo no la xe solo na virtù, ma anca on'arte. On'arte a disposizion... de chi ga tenpo!